

“Anìn!” consegnât ai gnûfs arlêfs des classis primis e tiercis de scuele primarie

Dadis fûr 7.300 copiis. L'ûs dal manuâl pal insegnament de lenghe e de culture furlane al cjape dentri in dut plui di 20.000 scuelârs dai Istitûts comprensîfs e des Scuelis paritariis dal Friûl

Cul tacâ dal gnûf an scolastic, “Anìn!”, il prin manuâl pal insegnament de lenghe e de culture furlane pe scuele primarie, al è stât consegnât ai gnûfs iscritti di ogni cicli scolastic: in dut a son plui di 7.300 arlevis e arlêfs des classis primis e tiercis, che i lôr gjenitôrs a àn aderît al insegnament dal furlan a scuele. Cun di plui, al è stât consegnât il volum “Liniis Vuide pai docents” ai insegnants che no lu vevin.

“Anìn” al è un progjet promovût de ARLeF – Agenzie regjonâl pe lenghe furlane, cul supuart de Regjon Autonome Friûl-Vignesie Julie, in atuazion de leç 482/99 e de leç regjonâl 29/2007.

La consegne dai volums, curade de ARLeF, e je stade fate tai passe 200 ples di 60 Istitûts comprensîfs e Scuelis paritariis des ex provinciis di Gurize, Pordenon e Udin. Une distribuzion capilâr, che e ven dopo di chês fate in ocasion dal a.s. 2022/2023, cuant che a ricevi pe prime volte il gnûf manuâl a jerin stâts plui di 20.000 students.

“Anìn!” al è un strument inovatîf che al esplore la lenghe furlane, il teritori, la gjeografie, la storie, la culture dal Friûl e tal stes timp al favorîs il jentrâ intune dimension plurilengâl de educazion, cul inseriment de lenghe inglese e il riferiment a chês altris lenghis feveladis tal teritori regjonâl.

Si trate di doi volums: “Anìn! 1” pe prime e pe seconde classe e “Anìn! 2” pe tierce, cuarte e cuinte classe. Cul prin volum, i arlêfs a puedin rivâ a cjapâ sù planc a planc la competence comunicative orâl, une prime capacitât di leture e i prins elements di gramatiche, ortografie e ûs de lenghe; cul secont, a van insot tes competencis linguistichis e comunicativis, ma ancje tes carateristichis storichis e gjeografichis dal Friûl, intune logjiche interdissiplinâr e interculturâl. Il secont volum, in particolâr, al è insiorât ancje di aprofondiments specifics di educazion civiche e il test si pues doprâ tal orari curicolâr ordenari di storie e gjeografie, secont dal program CLIL (Content and Language Integrated Learning).

Anìn! 1 e 2 a son caraterizâts di une grafiche studiade par judâ i fruts a orientâsi tal test cence dificolât. A tegin dentri percors cun tabelis figuradis, mapis di cognossince, box cun glossaris e peraulis clâf. Dentri si cjatin ancje cetantis imagjins metudis a disposizion sore nuie di istituzions, museus, ents locâi e privâts di dute la regjon.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Realizâts de ARLeF in colaborazion cu lis Edizioni didattiche Gulliver e in graciis di un grup di esperts e docents coordinâts de professore Rosalba Perini, i doi volums a rispietin ad in plen il Plan aplicatîf di sisteme pal insegnament de lenghe furlane de Regjon Autonome Friûl-Vignesie Julie e lis liniis vuide dai materiâi didatics pal insegnament dal furlan a scuele fatis buinis de ARLeF.

Udin, ai 13 di Otubar dal 2023

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<